

mus, quem nemo sequitur. Quod autem ibidem addit Matthæus, Et non cognouit eam quousque peperisset: non arguit probatue Iosephum cum ea post partum coijisse. Denique quod iidem afferunt quosdam in Scriptura nominari fratres Christi, uti Iacobum, Galat. 1. versu 19. leue est. Fratris enim nomen ex more Hebræorum, omnes qui sunt eiusdem cognationis complectitur: quanquam ait Eusebius lib. 2. c. 1. hunc Iacobum, qui iustus vel Oblia dictus est, à quibusdam putari esse filium Iosephi viri Mariæ, sed falsó. Atque hæc sunt exigua huius hæreseos robora. Accedo igitur eorum sententiæ qui Mariam matrem Christi selectissimum Dei organum fuisse sentiunt, & eam ἀειπαρθένον, id est, ante & post partum virginem mansisse, & vixisse scribunt, non quòd tamen eam coniugem votum virginittatis vouisse, idque marito significasse assentiar, ut est in Can. Beata. & Can. Sic quippe. 27. quæst. 2. Et de hac quidem quæstione satis. Cui fuerunt contrarij Collyridiani, de quibus agemus in Arabicis hæreticis infra.

CAP. LVII.

Messaliani cur sic dicti. Erroris autem eorum capita tria commemorantur.



Messalianorum postremam ponit Epiphanius hæresin, quòd nomen ex lingua Syria est. Græcè autem dicuntur Ἐὐχῆται, ab orando sic appellati. Tantum enim orant, ut eis, qui hoc de illis audiunt, incredibile videatur. Nam quum Dominus dixerit, Oportet semper orare, &